

Broj: 01-1-1002/25

Datum: 23.7.2025.

ZAPISNIK SA 53. REDOVNE SJEDNICE UPRAVNOG ODBORA JU BIBLIOTEKA SARAJEVA

održane dana 21.7.2025. godine (ponedjeljak) u poslovnoj zgradi Biblioteke, u ulici Mis Irbina br. 4, s početkom rada u 16.00 sati

Sjednicu je otvorila i sjednicom predsjedavala Aida Čupović, predsjednica Upravnog odbora, konstatirajući prisustvo sastava Upravnog odbora kako slijedi:

- Aida Čupović, predsjednica Upravnog odbora,
- Ivana Henda, članica Upravnog odbora,
- Slobodan Šoja, član Upravnog odbora,
- Midhad Kurtović, član Upravnog odbora ispred ustanove,
- Edo Pamuk, opravdano odsutan.

Sjednici prisustvuje Direktorica Merima Lendo, te Edhem Kurtić, voditelj Službe za ekonomsko-finansijske i opće poslove, kao izvjestilac III tačke Dnevnog reda

Zapisnik vodi Azra Šabanić, tehnički sekretar.

Predloženi Dnevni red jednoglasno je usvojen i glasi:

1. Zapisnik sa 52. sjednice Upravnog odbora JU „Biblioteka Sarajeva“:
Prilog: Zapisnik sa 52. sjednice Upravnog odbora;
2. Utvrđivanje zaključaka o realiziranim odlukama i aktivnostima sa 52. sjednice;
3. Izmjena i dopuna Plana javnih nabavki JU Biblioteka Sarajeva za 2025. godinu:
Prilog: Izmjena i dopuna Plana javnih nabavki JU Biblioteka Sarajeva;
4. Razno.

Ad. 1

Zapisnik sa 52. sjednice Upravnog odbora JU „Biblioteka Sarajeva“ sastavljen je i usvojen na 52. sjednici, te je kao prilog upućen Ministarstvu kulture i sporta Kantona Sarajeva sa ostalom dokumentacijom koja je pratila proces izbora i imenovanja direktora JU Biblioteka Sarajeva.

Ad.2

Utvrđivanje zaključaka o realiziranim odlukama i aktivnostima sa 52. redovne sjednice, **jednoglasno usvojeno.**

Ad.3

Kao izvjestilac po pitanju treće tačke Dnevnog reda, Izmjena i dopuna Plana javnih nabavki JU Biblioteka Sarajeva za 2025. godinu, prisutnima se obratio Edhem Kurtić voditelj Službe za ekonomsko-finansijske i opće poslove, te naglasio da izmjena pomenutog Plana podrazumijeva transfere koji su pristigli od Američke

ambasade kao finansijska podrška za odjeljenje Američki kutak. Riječ je o transferima koje je teško planirati, te se iz toga razloga unose se naknadno u plan javnih nabavki. U ovome slučaju transfer je raspoređen na dvije stavke i to:

- Elektroinstalacijski radovi u pozajmnom odjeljenju Američki kutak
- Usluge štampanja promotivnog materijala za Američki kutak.

Treća tačka Dnevnog reda **jednoglasno usvojena.**

Ad.4

Pod tačkom razno prisutnima se obratila Predsjednica upravnog odbora JU Biblioteka Sarajevo Aida Čupović i upoznala članove sa informacijom o dopisu koji je zaprimljen od Ministarstva kulture i sporta Kantona Sarajevo, a upućen od strane predsjednice sindikalne podružnice JU Biblioteka Sarajeva Esme Bajraktarević-Rožman i Midhada Kurtovića, radnika JU Biblioteka Sarajeva, naslovljen na Predsjednicu upravnog odbora i Direktoricu JU Biblioteka Sarajeva Merima Lendo, a tiče se rada Upravnog odbora.

Shodno navedenom imenovane su se i očitovale, te će pismeno očitovanje biti upućeno prema Ministarstvu kulture i sporta Kantona Sarajevo.

Direktorica JU Biblioteka Sarajeva Merima Lendo obavještava prisutne članove Upravnog odbora o novostima u poslovanju kao i realiziranim aktivnostima, pa navodi:

- Jedna smo od prvih ustanova kulture u Kantonu Sarajevu koja je završila i dostavila plan integriteta izrađen prema novom „Uputstvu za izradu i provođenje plana integriteta institucija javnog sektora u Kantonu Sarajevo“.
- Također smo jedna od prvih ustanova koja je završila izradu Mape procesa i Registra rizika, a što je zakonska obaveza svih institucija.
- Uz konsultacije sa Uredom za borbu protiv korupcije i na temelju sastanka sa Udruženjem izdavača BiH, sačinjen je elaborat i inicijativa za izmjenu dijela Zakona o javnim nabavkama BiH, a koji se odnosi na prijedlog isključenja primjene istog na nabavku knjiga kada su u pitanju biblioteke. S obzirom da je trenutno aktuelan rad na izmjenama i dopunama navedenog Zakona, očekujemo da će naša inicijativa biti uzeta u razmatranje.
- Sa Općinom Novi Grad Sarajevo potpisan je ugovor o besplatnom učlanjivanju sugrađana nastanjenih u toj općini. Pravo na besplatne članarine ostvarit će 1000 građana i građanki sa područja ove općine, čime su uspješno nastavljeni projekti poticanja čitanja i učlanjenja u biblioteku sa lokalnim zajednicama na prostoru Kantona Sarajevo.
- Također, Općina Hadžići je, kao i prethodne godine, uvrstila u Budžet novčana sredstva koja predstavljaju podršku JU Biblioteka Sarajeva u vidu besplatnih članarina za dobnu skupinu od 15 do 30 godina građana i građanki sa prebivalištem na pomenutoj Općini.
- Povodom obilježavanja tridesete godišnjice genocida u Srebrenici u prostorijama multimedijalnog centra „Mak“, upriličena je tematska izložba i promocija Bibliografije publikacija o genocidu u Srebrenici iz fonda JU Biblioteka Sarajeva. Izložba je trajala od 7. do 11.7.2025. godine, a Bibliografija će biti objavljena u časopisu Izraz.
- Održan je sastanak sa Ministrom kulture i sporta Kantona Sarajevo, gosp. Kenanom Magodom, a razgovarano je o aktuelnim poslovima i budućim planovima Biblioteke.
- Upriličen je sastanak sa načelnikom Općine Ilijaš, u razgovaralo se o inicijativi OV Ilijaš za pridruživanje biblioteke našoj ustanovi koja trenutno djeluje u sklopu Centra za kulturu Ilijaš i posjeduje cca. 15.000 bibliotečkih jedinica.
- JU „Biblioteka Sarajeva“ bila je domaćin radne posjete gospodina Samira Avdića, predsjednika Komisije za kulturu i sport Skupštine Kantona Sarajevo, gospodina Jasenka Šabotića, direktora JU Kulturno-sportski i rekreacioni centar Ilidža i gospodina Samira Habote, vijećnika OV Ilidža. Tokom posjeta razgovarano je o potrebi pronalaska adekvatnijeg prostora za bibliotečko pozajmno odjeljenje na Ilidži, koje se trenutno

nalazi u prostoru bivšeg kina „Igman“. U fokusu razgovora bila je vizija biblioteke kao funkcionalnog i sadržajno bogatijeg prostora, koji ne samo da će zadovoljiti standarde savremene bibliotečke prakse, već će ih i dodatno oplemeniti svojim programskim, edukativnim i kulturnim angažmanom. Pored toga, razgovaralo se i o biblioteci koja djeluje u sklopu Doma kulture u Hrasnici, a koja bi nam se u dogledno vrijeme mogla i organizaciono priključiti.

- Federalno ministarstvo za obrazovanje i nauku, doniralo je Biblioteci Sarajeva vrijedne knjige. Riječ je o odabranim izdanjima stručne literature iz različitih naučnih oblasti, koja će značajno doprinijeti obogaćivanju bibliotečkog fonda i sigurno biti od velike koristi našim korisnicima.
- Ustanova je zaprimila dokument u vidu pisma najave praćenja provođenja preporuka datih u izvještaju od strane interne revizije, a nakon njihove posjete u predhodnom periodu, a kao prilog dostavljen je upitnik o realizaciji preporuka koji je ispunjen i upućen prema Ministarstvu finansija Kantona Sarajevo.
- Prvi put, a prema preporukama Interne revizije, pokrenut je konkurentski zahtjev u postupku nabavke knjiga i to u procijenjenoj vrijednosti 24.000 KM bez PDV-a.
- S obzirom na manjak radnika, u mjesecu julu smo uspjeli obezbijediti rad svih pozajmnih odjeljenja – bez zatvaranja istih. U augustu ćemo najvjerovatnije morati zatvoriti par pozajmnih odjeljenja, ali će korisnici kao i do sada moći koristiti usluge Biblioteke u drugim pozajmnim odjeljenjima, te se zatvaranje ne bi trebalo drastično osjetiti.
- Preseljenje pozajmnog odjeljenja s Vratnika na novu lokaciju u ul. Mula Mustafe Bašeskije je okončano i sve je spremno za otvaranje i početak rada (čekamo samo da prođe sezona godišnjih odmora).
- U toku je inicijativa Biblioteke za dobijanje saglasnosti za zapošljavanje novih radnika.

ZAKLJUČCI:

- Utvrđivanje zaključaka o realiziranim odlukama i aktivnostima sa 52. redovne sjednice Upravnog odbora JU „Biblioteka Sarajeva“, jednoglasno usvojeno.
- Kao izvjestilac po pitanju treće tačke Dnevnog reda prisutnima se obratio Edhem Kurtić voditelj Službe za ekonomsko-fnansijske i opće poslove, te obrazložio pomenutu tačku koja je kao takva jednoglasno usvojena;
- Informacija prisutnim članovima Upravnog odbora JU Biblioteka Sarajeva o očitovanju predsjednice Upravnog odbora JU Biblioteka Sarajeva i direktorice Merime Lendo, na dopis zaprimljen od strane Ministarstva kulture i sporta, a upućen od strane predsjednice sindikalne podružnice JU Biblioteka Sarajeva i Midhada Kurtovića;
- Pod tačkom Razno direktorica je informirala prisutne članove o realiziranim poslovima i aktivnostima u proteklom periodu.

Sjednica je završena u 16.50 sati.

ALIBABA B17A

